

दिनांक 17.02.2025

समय: 18.45 बजे

- विधानसभा अध्यक्ष वासुदेव देवनानी सगळी सियासी पार्टियां रा नेतावां ऊं सदन री कार्यवाही शांति सागे चलावण अर चर्चा मांय मदद करण री अपील कीनी।
- केन्द्रीय गृह राज्य मंत्री नित्यानंद राय हिन्दी भाषा रा प्रचार—प्रसार माथे जोर देता थकां राजभाषा अर जन भाषा बीचे दूरी मिटावण बाबत म्हयो।
- राजस्थान समेत देश रा न्यारा—न्यारा राज्यां अर केन्द्र रा राज वाळा प्रदेशां मांय काल नक्शा प्रोजेक्ट सरू कर्यो जावेला— ड्रोन सर्वे रे जरिये जमीं रा रिकॉर्ड री डिजिटल मैपिंग व्हेला।
- प्रदेश रा मौसम मांय काल ऊं बदलाव रा आसार— शेखावाटी हलका मांय हल्की बारिश रा आसार।

000

विधानसभा अध्यक्ष वासुदेव देवनानी म्हयो है के सदन रो मान बणायो राखण री जिम्मेदारी सत्ता पख अर विपख दोन्यू रो है। वे आज विधानसभा मांय व्ही सगळी पार्टियां रा नेतावां री मीटिंग मांय बोल रह्या हा। देवनानी सगळी पार्टियां रा नेतावां ऊं सदन री कार्यवाही शांति सागे चलावण अर सकारात्मक चर्चा मांय मदद करण री अपील कीनी। फोन टैपिंग मामला रे कारण सदन मांय आयी अडचन ने खत्म करण रा मकसद ऊं बुलायी ज्यी ई मीटिंग मांय देवनानी सदस्यां री ओर ऊं उठायी ज्या मुद्दा माथे विगतवार चर्चा कीनी। ई पाछे खबरनवीसां सागे बातचीत करता थकां विपख रा नेता टीकाराम जूली सरकार ऊं मंत्री किरोड़ी लाल मीणा कानी ऊं सरकार माथे लगायी ज्या आरोपां रा मामला माथे सदन मांय जवाब देवण री मांग कीनी।

.....

दूजी कानी संसदीय कार्यमंत्री जोगाराम पटेल खबरनवीसा सागे बातचीत मांय म्हयो के विपख ने सदन री कार्यवाही चलावण मांय मदद करणी चाहिजे।

.....

ध्यानजोग है के राज्य रो माली साल 2025–26 रो बजट 19 फरवरी ने पेश कर्यो जावेला।

000

मुख्यमंत्री भजनलाल शर्मा म्हयो है के हिन्दी रा प्रचार—प्रसार री सगळां री जिम्मेदारी है। वे आज गृह मंत्रालय रा राजभाषा विभाग री ओर ऊं जयपुर मांय राख्यी ज्या संयुक्त क्षेत्रीय राजभाषा सम्मेलन मांय बोल रह्या हा। वे म्हयो के राजभाषा हिन्दी भाषा, संस्कृति, सोच अर विचारां रो मजबूत रूप है। डिजिटल जमाना मांय हिन्दी रा महत्त्व रो जिकर करता थकां मुख्यमंत्री म्हयो के कम्प्यूटर माथे हिन्दी मांय काम करण रा नुवा तरीकां अर सुबीतां ऊं केई पहल करी जा रही है।

.....

सम्मेलन मांय केन्द्रीय गृह राज्य मंत्री नित्यानंद राय म्हयो के देश री न्यारी—न्यारी भाषावां रो मान बणायो राखता थकां हिन्दी ने राष्ट्रीय बोलचाल री भाषा बणावण सारू सगळा ने मिल र कोशिश करणी व्हेला। वे म्हयो के जनता रा भला री बात वां री भाषा मांय पूगावण ऊं ई लोकतंत्र मजबूत बण सके है।

श्री राय म्हयो के म्हयो के सरल अर आसान भाषा काम ले र राजभाषा अर जनभाषा बीचे दूरी खत्म करणी व्हेला।

.....

उपमुख्यमंत्री डॉ. प्रेमचंद बैरवा म्हयो के भारत ही नहीं बल्कि दूजा देशां मांय ई हिन्दी भाषा घणी पसंद करी जावे है। वे भारत री भाषावां री बेहतरीन साहित्यिक लेखन रो अनुवाद हिन्दी मांय अर

हिन्दी रा लेखन रा अनुवाद भारत री दूजी भाषावां मांय करण माथे जोर दीनो। श्री बैरवा कह्यो के भाषायी सद्भाव ऊं देश रा एका री भावना ने मजबूत करी जा सके है। ई मौके सरकारी कामकाज मांय हिन्दी मांय बेहतरीन काम करण वाळा केन्द्र सरकार रा दफ्तरां, सरकारी बैंकां अर सरकारी उपक्रमां री 110 प्रतिभावां रो मान करी ज्यो। कार्यक्रम मांय जयपुर री सांसद मंजू शर्मा अर राजभाषा विभाग री सचिव अंशुली आर्य अर संयुक्त सचिव डॉ. मीनाक्षी जौली समेत 16 राज्यां अर केंद्र रा राज वाळा प्रदेशां मांय केंद्र सरकार रा दफ्तरां, बैंकां अर सरकारी उपक्रमां रा आला अहलकार मौजूद रह्या।

000

लोकसभा अध्यक्ष ओम बिरला कोटा मांय लारला दिनां गैस रिसाव रे कारण मांदा व्ह्या बच्चां सागे आज मुलाकात कीनी। श्री बिरला जे.के. लोन अस्पताल मांय बच्चां रा स्वास्थ्य री जाणकारी लीनी। वे कह्यो के बच्चां रो ईलाज मेडिकल बोर्ड री देखरेख मांय कर्यो जा रह्यो है।

एस.बी. ओम बिरला

ध्यानजोग है के गड़ेपान मांय एक कैमिकल फैक्ट्री ऊं गैस रो रिसाव व्हेवण रे कारण नजदीक री स्कूल री कुछ टाबरियां ने सांस लेवण मांय तकलीफ री शिकायत पाछे सरकारी अस्पताल मांय भर्ती करायी ज्यी ही।

000

राजस्थान समेत देश रा न्यारा-न्यारा राज्यां मांय डिजिटल इंडिया आधुनिकीकरण कार्यक्रम रा तैत काल नक्शा प्रोजेक्ट सुरू कर्यो जावेला। केन्द्रीय ग्रामीण विकास मंत्री शिवराज सिंह चौहान रो काल मध्यप्रदेश ऊं ई राष्ट्रीय परियोजना रो उद्घाटन करण रो कार्यक्रम है। 26 राज्यां अर केन्द्र रा राज वाळा तीन प्रदेशां रा 152 स्थानीय निकायां मांय इण री सुरूआत करी जावेला। पेश है एक रपट—

.....

उदयपुर मांय राष्ट्रीय जल मिशन अर जलशक्ति मंत्रालय री ओर ऊं राज्यां रा जल मंत्रियां रो सम्मेलन “वाटर विजन-2047” राख्यो जा रह्यो है। इण मांय जल प्रशासन ने मजबूत करण, पाणी भेलो करण अर वां री पूर्ति बधावण अर पीवण अर पाणत सारू पाणी मुहैया करावण सारू बेहतर सेवा देवण रा बारा मांय विचार कर्यो जा रह्यो है। जल शक्ति मंत्री सी.आर. पाटिल रो काल सम्मेलन ने सम्बोधित करण रो कार्यक्रम है। मुख्यमंत्री भजनलाल शर्मा रे ई इण मांय शिरकत करण रा आसार है। दूजी कानी उदयपुर मांय आज बांधां री हिफाजत अर पुनर्वास रा बारा मांय राज्य स्तर रो सम्मेलन राख्यो ज्यो। कार्यक्रम मांय जल संसाधन मंत्री सुरेश सिंह रावत कह्यो के पीवण रो पाणी भेलो करण, बिजली बणावण अर बाढ़ ने काबू करण मांय बांधां रो खास काम है। वे कह्या के राज्य सरकार बांधां ने और सुरक्षित बणावण री कोशिश कर रही है।

000

उपराष्ट्रपति जगदीप धनखड़ रो काल जयपुर रो दौरा करण रो कार्यक्रम है। श्री धनखड़ री फोर्टी री ओर ऊं राष्ट्र निर्माण में उद्यमियों की भूमिका मुद्दा माथे राख्या जावण वाळा ई सम्मेलन मांय शिरकत करण री संभावना है।

000

प्रदेश रा शेखावाटी हलका मांय काल कठे-कठे छांटो-छिड़को व्हेवण रा आसार है। 19 अर 20 फरवरी ने ई बीकानेर, श्रीगंगानगर, हनुमानगढ़, चूरू, नागौर, सीकर, झुंझुनूं अर अलवर जिलां मांय कठे-कठे हल्की बरसात री संभावना है। ई बीचे राज्य रा उत्तराद-आतूणी अर उत्तराद हलकां मांय कठे-कठे बादळां री गाज सागे हल्की बारिश रा आसार है।

000

ओलम्पिक खेलां मांय तमगो जीतण वाळी मुक्केबाज मैरी कॉम, पैरालम्पिक मांय सोना रो तमगो जीतण वाळी निशानेबाज अवनि लेखरा अर भारत रा बैडमिंटन खिलाडी सुहास लालिनाकरे यथिराज परीक्षा पे चर्चा कार्यक्रम रा सातवां एपिसोड मांय परीक्षा रा तनाव रो सामो करण ऊं जुड़्या विचार बताया। ई दौरान अवनि विद्यार्थियां ऊं रोजीना ध्यान लगा र पढ़ाई करण बाबत कह्यो। वे कह्यो के सांस ऊं जुड़ी कसरत परीक्षा मांय दिल री धड़कन शांत राखण मांय मदद करे है।

.....

राजस्थान हाईकोर्ट रा मुख्य न्यायाधीश न्यायमूर्ति एम.एम. श्रीवास्तव आज कोर्ट री जोधपुर मांय मुख्य पीठ मांय श्री मनीष शर्मा ने जज रा ओहदा री शपथ दिरायी। मनीष शर्मा वकील कोटा ऊं हाईकोर्ट मांय जज बणायी ज्या है। श्री शर्मा रे शपथ लिंगा पाछे अब राजस्थान हाईकोर्ट मांय न्यायाधीशां री तादाद बध र 34 व्हे गयी है।

000